

VEDTEKTER FOR GRAVPLASSANE I TIME

Gjeld frå 01.03. 2013.

Vedtekne i Time kyrkjelege fellesråd 31.01.13.

Godkjente av Stavanger bispedømmeråd 07.02.13.

Oppdatering frå 01.01.19.

Jfr. Lov av 7 juni 1996 nr. 32 om gravplassar, kremasjon og gravferd § 21

§ 1. Gravplasstilhøyring.

Avlidne personar i kommunen kan gravleggjast på den gravplassen i kommunen dei sokner til. Dette gjeld og om den avlidne på grunn av sjukdom eller alderdom har budd i eit anna sokn eller i ein annan kommune mot slutten av livet.

§ 2. Fredingstid og festetid.

Fredingstid for oskeurner og kister er 20 år.

Festetid er 5 år.

På deler av kvartal E og F på Undheim gravplass, deler av kvartal 8 og heile kvartal 4 på Time gravplass skal det ikkje setjast ned kister.

§ 3. Feste av grav.

Når kistegrav vert teke i bruk er det høve å festa ei grav ved sida av, og etter godkjenning av kyrkjeleg fellesråd, ei ekstra grav i tillegg når det er bruk for det. Desse gravene utgjer då ein gravstad. Den grava som tas i bruk først i ein gravstad, er fri grav i fredingstida.

Ved bruk av urnegrav kan ein ikkje feste grav ved sida av.

Når festetida er ute, kan gravstaden festast for nye 10 år. Når det er gått 60 år etter siste gravlegging kan feste ikkje fornyast utan særskild samtykke frå kyrkjeleg fellesråd. I god tid før festetida er ute skal festaren varslast. Er festet ikkje fornya innan 6 månader fell gravstaden tilbake til kyrkjegarden.

Ingen kan gravleggjast i festa gravstad utan samtykke frå festaren. Dersom festaren sitt samtykke ikkje kan innhentast, kan kyrkjeleg fellesråd avgjera spørsmålet om gravlegging.

Festaren pliktast melda frå om endring av adresse.

§ 4. Grav og gravminne.

Kyrkjegardsbetjeninga vil syte for planering og tilsåing av grava etter gravlegging.

Kyrkjeleg fellesråd skal godkjenne gravminne og fundament før plassering på gravplass. Gravminnet skal plasserast på anvist plass i samsvar med forskrift. Gravminnet vert ståande der for godt.

Festar av grav eller ansvarleg for fri grav er eigar av vedkomande gravminne. Eigar er ansvarleg for at gravminne ikkje er i forfall, til sjenanse eller til fare for ferdsel på gravplassen. Eigar skal syta for fjerning av gravminne frå grav som ikkje er festa. Gravminne eldre enn 60 år kan ikkje fjernast utan godkjenning.

§ 5. Vern.

Bandlegging av middelalderkyrkjegard, Gjeld areal rundt Time kyrkje, kvartal 1, 2 og 3.

Alle inngrep i grunn eller andre tiltak er ulovleg utan forhandsgodkjenning.

Gravfelt som ikkje har vært i bruk etter 1945 skal ikkje brukast til gravlegging eller andre inngrep.

Fjerning av og oppsetting av nye gravminner og gravutstyr skal godkjennast av kyrkjeleg fellesråd og eventuell vernemyndighet.

§ 6. Plantefelt.

Framfor gravminnet er det høve til å opparbeide eit plantefelt i høgd med bakken rundt.

Kantstein omkring plantefeltet, dvs. minst tre rette steinstykke som blir lagt på tre sider av plantefeltet eller liggjande plate framfor gravminnet, skal flukte med terrenget omkring. I fallande terreng skal kantstein og plate trappast i forhold fundament til gravminne. Plate og fundament skal ikkje vera same stykke.

Heil eller delt plate, med eller utan hol til planter, skal leggjast i drenerande masse og vera 4 – 8 cm tjukk.

Avstand frå plantehol til ytterkant av plate skal vera minst 8 cm.

Plantefelt skal ha same lengde som fundamentet til gravminnet, og breidde inntil 65 cm målt frå bakkant av fundament.

Ved montering av heil eller delt plate, med eller utan hol til planter skal eigar gjennom avtale med kyrkjeleg fellesråd ta på seg ansvar for skader påført ved vanleg drift og vedlikehald av gravplassen.

Det er ikkje høve å bruka faste dekorting, så som liggjande plater, blomsterurner, lykter m.v. utafor plantefeltet. Lause dekorting skal fjernast etter bruk.

Det kan ikkje stå planter som er høgare enn gravminnet eller går utover plantefeltet.

Dersom det ikkje er aktuelt å ha plantefelt, skal det vera grasbakke på alle sider av gravminnet.

§ 7. Stell av grav.

Alle graver skal haldast i orden og vera velstelte. Den som er ansvarleg for frigrav eller gravfestar har rett og plikt til å stelle den grava han har ansvar for. Plantefelt som ikkje vert tilplanta og stelt skal såast til av den ansvarlege eller gravplassbetjeninga.

Planter, kransar og liknande tilfang som vert nytta ved gravferd eller ved pynting av grav, og som endar som avfall, skal vera heilt komposterbart.

Det er ikkje tillate å setja ned frittståande plastlys med eller utan metallhette på gravene. Slike lys kan likevel nyttast, dersom dei blir sette inn i lykter, som gjer at fuglar ikkje kan få tak i dei.

Kyrkjeleg fellesråd kan syte for årleg planting på grav mot betaling.

§ 8. Stellavtale.

Kyrkjeleg fellesråd kan ta på seg ansvaret for stell av grav mot førehandsinnbetaling for eit år om gongen.

§ 9. Bårerom.

Kyrkjeleg fellesråd disponerer bårerom. Slike rom skal berre nyttast til å ta vare på avlidne i tida fram til gravferda. Ingen har tilgjenge utan etter løyve. Liksyning kan berre gjerast etter samtykke frå den som syter for gravferda, og vedkjem ikkje dei tilsette.

§ 10. Næringsverksemd.

Næringsdrivande som ynskjer å driva verksemd på gravplassane skal ha løyve frå kyrkjeleg fellestråd. Løyvet kan kallast tilbake dersom vedkomande ikkje retter seg etter dei reglane som gjeld. Slik verksemd kan berre omfatta montering og vedlikehald av gravminne, og planting og stell av graver.

Gravplassbetjeninga kan ikkje mot godtgjering utføra tenester for private eller næringsdrivande. Dei kan heller ikkje engasjera seg i sal av varer og tenester som har med gravplassane å gjera.

§ 11. Administrasjon.

Kyrkjeverje er av kyrkjeleg fellestråd delegert mynde på vegne av kyrkjeleg fellestråd i samsvar med lov, forskrift og vedtekter.